

La Quotidiana 14-4-2015, p. 13

■ PRO SVIZRA RUMANTSCHA

Stgaffir punts tranter l'entira Rumantschia

(anr) La Pro Svizra Rumantscha (PSR) è vegnida fundada 1992 per realisar ina gasetta rumantscha dal di. Ella ha fatg fitg buns servetschs da spendrera fin che «La Quotidiana» è daventada 1997 realitad. Suentar ha ella contribuì plirs onns surtut a la scolaziun e perfecziun dals schurnalists. La PSR ha dentant schlargià ses radius d'acziun cun metter novs accents. Dapi ina retscha dad onns sa dat ella fadia da promover contacts entaifer la Rumantschia, tant anen- sco anovers.

In punct fix è perquai daventà il champ da vacanzas da stad dapi insaquants onns. Concret èsi ì era 2014 per «Chavar aur e cristals sissum la Surselva». Pli che 20 uffants han passentà l'onn passà in'emna da fanadur a Sedrun. La maioritad dad els eran indigen, ma era tals da l'Engiadina e Surmeir han prendì part. Els èn vegnids introducids ed instruids da *Prisca Berther* e *Sandro Cavegn*. Da la partida è era il musicist indigen *Pascal Gamboni* stà.

Jon Domenic Parolini ha demissiunà – en consequenza da sia tscherna en la regenza – sco president dal cussegl da fundaziun da l'anr ed era sco represchentant da la PSR en quest gremi. Sco ses successur e nov represchentant da la PSR en il cussegl da fundaziun da l'anr è cusseglier naziunal *Martin Candinas* vegnì elegì.

La PSR è leda da pudair finanziar la gronda part da sias activitads ord atgnas funtaunas. Sia facultad è considerabla ed era il quint per 2014 positiv.

Uonn ha il champ da vacanzas lieu dals 19 – 24 da fanadur per la quarta giada a Sedrun. La radunanza annuala salva la PSR ils 17 d'avrigl a Cuira sut il presidi da Catarina Morscher, Alp Flex/Sur.